

懷德縣志第十四卷 慈善

目次

教養工廠

善舉

賑務

善局

醫藥研究會

懷德縣志

卷十四 慈善

八

新京福文盛印書局印

懷德縣志第十四卷

慈善

芸芸衆生憂樂至不一也或以秉賦不均而形分完缺或以常變殊勢而境有順逆此人群中所以安樂者少而疾苦者衆也使國家無慈善之政社會無好施之家爲之補救則疲癯殘疾與夫顛連無告者皆呻吟展轉於溝壑矣夫民胞物與之懷博施濟衆之美書之史冊歷歷可考本邑昔爲榛莽墾殖甫滿百年慈善事業固多闕略然積修之士好善之家爲社會造幸福爲桑梓溥樂利者亦大有人在茲編摘要書之著已往即勵來茲也述慈善

教養工廠 在後街路北係典史公署舊址民國七年改建廠分二科曰柳灌科曰織席科廠長一書記一看役四常年經費四千七百元由地方公款項下開銷旋以款絀停辦民國十五年秋趙令條舉清鄉治本辦法議辦教養工廠經擬章程呈奉核准然亦艱於款項未果十七年吳令議以地方款節餘提撥基金二萬元并編製常年預算書呈奉 省憲核准未及實行調任去是年冬縣長李公以該廠爲急務遂議以縣立第八初級小學校之南爲工廠地基遴選邑紳于漢清從事籌備現已將建築所需之工科核實估妥造具預算書呈明 省府不日即將建修顧劃撥之款悉爲紙幣現值鑲法日非底款日縮將

來之支銷能不免拮据哉

畢氏捐米施粥 邑紳清漢教習附生畢文林之祖 世居城西畢家窪子于光緒十五年秋因陰雨數旬遼河泛溢爲災爰捐小米五十石於秦家屯設粥鍋以食災黎保全甚衆二十五年經高令暄陽籌辦積穀獨捐穀五十石爲倡每有攜家遠徒或貧民乞丐經其門者均行帶入膳房予一餐凡數十年如一日至於建書院修學堂與一切地方公益事無不首先贊助家中食指二百七世同居人咸謂爲樂善之報云

趙氏捐資興學 邑紳清禮部郎中舉人趙晉臣之祖母趙劉氏世居城西新集城東於光緒三十二年創辦學校獨捐資千

兩經制軍趙爾巽奏准給予樂善好施字樣准其建坊以爲熱心興學者勸他如光緒十五年之水災二十五年之積穀捐米捐穀數均爲一縣冠其子孝廉方正聲遠公開設太和典當利息較他當減三分之一戚邨子弟貧有不能就讀者延師教之成就者衆其孫花翎同知銜晉升及弟晉臣晉勳亦承先志獨出鉅資設立療養嗎啡所延醫合藥招集桑梓不良子弟戒除嗎啡毒癮復演說開導力行感化教育苦口婆心其來有自  
梁氏捐資興學 邑紳花翎三品銜梁豐年居本城後街於清光緒三十二年籌辦學校獨捐資千兩爲之倡經制軍趙公爾巽奏准建坊並給樂善好施匾額民國七年經浙江省長齊耀

珊繕具事實援褒揚條例設褒大總統徐頒給褒章並題義行可風四字匾額旌于門餘見人物志

張氏捐資興學 邑貢生張學貢 世居城南清光緒三十二年籌辦學校獨力捐銀千兩經制軍趙公爾巽奏准建坊並給樂善好施匾額

劉氏捐資施廟產 邑紳清五品頂戴附生劉海春之祖父曰瑄世居城西小邊村性醇而孝因父病曾前往東岳上香途遇危險卒免於難人咸謂神佑云爰施熟田八晌於本村建三皇廟招僧主持以荅神庥

徐氏義學 邑紳知府銜徐仁祥字瑞麟世居城南大榆樹屯光緒三十四年獨出鉅資於該屯建置學校一所招集本村子弟入學肄業職是該村學齡兒童未有不受教育者經制軍趙公爾巽奏獎知府銜以爲興學者勸

### 賑務

懷境地屬王荒向無賑濟之情事自賀令到任連年霖雨爲災光緒十四年尤甚公稟請軍督憲慶於十四年九月十五日由省發到賑銀五百兩及十七年成災亦重又稟請軍督憲裕於十八年二月二十日又發到賑銀五百兩前後二次共領賑銀千兩雖云杯水車薪難果衆腹亦可謂卹民疾苦惠及邊氓無遠弗屈矣

光緒十五年春有奸民以飢荒爲口實煽惑婦孺到處分糧藉以滋事賀公聞報拘而嚴懲幸未釀成事端乃勸令紳商富民捐糧設粥廠以賑之及新穀既登乃罷故年雖饑饉野無餓莩事後稟請軍督憲視捐糧之多寡給六七八品功牌之獎公之是舉可謂寬猛咸宜矣

懷境向無積穀自高令於光緒二十五年七月間到任始勸民積穀以備荒年及日俄交鬪積穀幾乎無著幸募令於光緒三十三年六月接印時值亢旱即認真調查積穀欠者嚴追以爲出貸之備積谷不致中墮者賴有此耳

宣統三年秋霖雨成災嗷鴻遍野次年春三月蕭令招集紳耆

籌議賑務呈請秋冬兩季附加捐賑濟極貧各戶之需併請放借積穀接濟次貧各戶均蒙省憲批准當即擬定章程設立籌荒處遴委士紳籍存綱趙鼎臣爲籌荒處幹事員以專責成嗣蕭令去任田令來懷下車伊始即以籌荒爲目前之急務除所擬條章仍舊照辦外而又悉心籌畫竭力經營分派在事各員一面清理積穀一面調查災區戶分兩等散放錢穀極貧者每人發給賑洋七角次貧者每人放給積谷二斗於五月間散放一次八月間補放一次計前後兩次共放積穀四千三百四十石零九斗四升三合共放小洋一萬四千八百二十七元三角有奇官紳一體極積進行待哺災黎略沾涓滴至十月間報竣

所有在事出力人員分別請獎茲將賑濟捐款分別於左

一 附加捐洋一萬一千四百四十九元三角零

一 度支司撥給賑洋二千元

一 罰款洋共一千三百七十八元零

### 善局

善局之設重在福利地方兼濟民生凡有公益之事皆應設法爲之提倡懷德昔有牛痘局一所自光緒十四年經賀公墳每見民間嬰兒出花施治多謬以致危亡惻然憂之爰在本城西街設立牛痘局名曰資善堂以拯救嬰孩危險選請善種醫生入局專司其事並曉諭屬界民人均聽赴局引種不取分文自

設局以來民間引種者日見增多所有局中醫生薪水伙食等項僅有入官盜產賭房共變價中錢一千一百吊旋據富民周甸元助中錢五百吊又另有入官賭房兩所售得房價中錢一百五十吊前後所籌各款共計中錢一千七百五十吊按年一分六厘發商生息每年計得利錢二百八十吊議定章程每年發給薪水中錢一百八十吊伙食中錢七十吊藥資中錢十吊其餘中錢二十吊每年發給該局修補房屋自行經理至民國六年經尹知事以款絀事廢從而取銷殊可惜也現任邑宰李公以事關民生不容久廢因擬酌撥地方公款剏設公主嶺施醫院先設內外兩科及產科種痘各門現已擬具意見書呈候

核示矣

### 醫藥研究會

縣境醫士程度參差藥劑亦多窳劣民國九年醫士劉子峯等爲精研醫藥慎重民命計倡設醫藥研究會凡業醫者率須入會研究限半年畢業及格者給以証書否則勒令改業計會員若干名歲納會費人各奉洋八元作爲本會經費嗣公主嶺一帶醫士以距縣路遠來往多艱請准獨立會所然其研究攷驗各辦法終遜總會近年以來積久漸懈高明醫士恥與衆伍其無學淺陋者尤多規避益以鑽法日壞會金難籌在會會員月僅廿餘名現邑宰李公以事關民生急宜整頓擬招全境醫士

嚴加攷驗切實研究刻已定期考試矣